



Grad Sarajevo
City of Sarajevo

Bosna i Hercegovina
Federacija Bosne i Hercegovine
Kanton Sarajevo
Grad Sarajevo
GRADONAČELNICA

Odluka
za nagrađivanje učenika srednjih škola koji su postigli zapažene rezultate na zvaničnim
takmičenjima iz određenih nastavnih predmeta u prethodnoj 2023./2024. školskoj godini iz
Budžeta Grada Sarajeva za 2024. godinu
(Prijedlog)

Predlagač: Gradonačelnica
Obrađivač: Gradska služba za obrazovanje,
sport, kulturu i mlade

Sarajevo, januar 2024. godine

Adresa: Hamdije Kreševljakovića 3
71000 Sarajevo, BiH
Tel: +387 33 407 443
Fax: +387 33 208 341
Email: grad@sarajevo.ba
Web: www.sarajevo.ba



Na osnovu člana 31. stav (1) tačka b) Statuta Grada Sarajeva („Službene novine Kantona Sarajevo“, broj 7/23), Gradsko vijeće Grada Sarajeva, na __. sjednici održanoj dana __. __. 2024. godine, donijelo je:

(Prijedlog)

Odluku

za nagrađivanje učenika srednjih škola koji su postigli zapažene rezultate na zvaničnim takmičenjima iz nastavnih predmeta/oblasti u prethodnoj 2023./2024. školskoj godini iz Budžeta Grada Sarajeva za 2024. godinu

I OPĆE ODREDBE

Član 1.

(Opće odredbe)

- (1) Ovom Odlukom utvrđuju se opće odredbe, način, kriteriji i postupak nagrađivanja učenika srednjih škola iz Budžeta Grada Sarajeva.
- (2) Nagrade za učenike srednjih škola sa područja Grada Sarajeva dodjeljuju se iz Budžeta Grada Sarajeva za 2024. godinu, za jedan ostvareni uspjeh u najvišem rangu takmičenja iz prethodne 2023./2024. školske godine.
- (3) Evaluacija nagrađivanja učenika srednjih škola vršit će se u skladu sa postignutim rezultatima na zvaničnim takmičenjima iz predmeta sadržanih u Kalendaru takmičenja, revija/smotri i drugih manifestacija koje su u organizaciji i učešću Ministarstva za odgoj i obrazovanje Kantona Sarajevo i Instituta za razvoj preduniverzitetskog obrazovanja Kantona Sarajevo u prethodnoj školskoj godini.
- (4) Nagrada će se isplaćivati jednokratno krajem budžetske 2024. godine u iznosu koji odluči Komisija, na osnovu sredstava obezbjeđenih u Budžetu Grada Sarajevo za 2024. godinu, postignutog rezultata i ostvarenog vladanja učenika iz prethodne 2023./2024. školske godine.

II NAČIN I KRITERIJI

Član 2.

(Način raspisivanja)

- (1) Gradonačelnik/ca Grada Sarajevo jednom godišnje, u četvrtom kvartalu tekuće godine, raspisuje Javni poziv za nagrađivanje učenika srednjih škola koji su postigli zapažene rezultate na zvaničnim takmičenjima iz određenih nastavnih predmeta u prethodnoj 2023./2024. školskoj godini iz Budžeta Grada Sarajeva za 2024. godinu (u daljnjem tekstu: „Javni poziv“), a na osnovu Kalendara takmičenja, revija/smotri i drugih manifestacija koje su u organizaciji i učešću Ministarstva za odgoj i obrazovanje Kantona Sarajevo i Instituta za razvoj preduniverzitetskog obrazovanja Kantona Sarajevo.
- (2) Javni poziv se objavljuje na službenoj web stranici Grada Sarajeva i sadrži uslove i kriterije koje kandidati moraju ispunjavati, rok i način za podnošenje prijave, te druge potrebne podatke.
- (3) Gradonačelnik/ca Grada Sarajeva će putem Gradske službe za obrazovanje, sport, kulturu i mlade (u daljnjem tekstu: „Služba“), po objavljivanju Javnog poziva na službenoj web stranici Grada Sarajeva, objaviti i Informaciju o raspisivanju Javnog poziva u dva štampana medija javnog informiranja.

Član 3.

(Pravo učešća)

Pravo učešća na Javnom pozivu iz člana 2. ove odluke imaju učenici srednjih škola:

- a) Koji imaju prebivalište/boravište na području jedne od četiri gradske općine (Stari Grad, Centar, Novo Sarajevo i Novi Grad);
- b) Koji se nalaze na redovnom školovanju;
- c) Koji ne obnavljaju razred.

Član 4. (Kriteriji)

Kriterij za nagrađivanje iz Budžeta Grada Sarajevo u skladu sa ovom odlukom jeste da je učenik srednje škole ostvario uspjeh na određenom nivou takmičenja u prethodnoj školskoj godini iz jednog predmeta, i to kako stoji u nastavku:

- a) Prvi nivo: takmičenje organizirano na nivou Kantona Sarajevo;
- b) Drugi nivo: takmičenje organizirano na nivou Federacije Bosne i Hercegovine;
- c) Treći nivo: takmičenje organizirano na nivou države Bosne i Hercegovine;
- d) Četvrti nivo: takmičenje organizirano na međunarodnom nivou.

Član 5. (Određivanje visine nagrade)

- 1) Ukupni iznos dodijeljene nagrade zavisit će od uspjeha ostvarenog u prethodnoj školskoj 2023./2024. školskoj godini.
- 2) Učenici sa ukupnim prosjekom ocjena 5,00 ostvarenim u prethodnoj školskoj godini ostvaruju pravo na dodjelu cjelokupne nagrade koju odredi Komisija, dok će učenici sa manjim prosjekom ocjena ostvariti nagradu u skladu s ostvarenim uspjehom.
- 3) Učešće na međunarodnim takmičenjima nagraditi u skladu sa raspoloživim sredstvima.

Član 6. (Prijava na Javni poziv)

- (1) Učenici srednjih škola sa područja Grada Sarajevo, koji se javljaju na Javni poziv, trebaju ispuniti Prijavni obrazac i dostaviti dokaze o ispunjenosti sljedećih uslova:
 - a) Izjava kandidata kojom se daje saglasnost da se njegovi podaci mogu obrađivati u skladu sa članom 5. Zakona o zaštiti ličnih podataka („Službeni glasnik BiH“, broj 76/11), (*Napomena: za maloljetne kandidate Izjavu daje roditelj/staratelj i ista treba biti ovjerena od strane nadležne općinske službe*).
 - b) Da su državljani BiH – *dostaviti uvjerenje o državljanstvu ili ovjerenu kopiju rodnog lista sa navedenom činjenicom o državljanstvu ne starije od 6 mjeseci od dana objave Javnog poziva;*
 - c) Da imaju prebivalište na području četiri gradske općine (*Stari Grad, Centar, Novo Sarajevo i Novi Grad Sarajevo*) najmanje 3 godine prije podnošenja prijave na Javni poziv- *CIPS;*
 - d) Svjedočanstvo o ostvarenom uspjehu u prethodnoj 2023./2024. školskoj godini;
 - e) Dokaz/uvjerenje/potvrda od matične škole da je učenik/ca učestvovao i ostvario rezultat na zvaničnom takmičenju iz srodnog predmeta na nivou Kantona Sarajevo, Federacije BiH, BiH ili međunarodnog takmičenja;
 - f) Ovjerena kopija diplome/potvrde o ostvarenom rezultatu na zvaničnom takmičenju iz srodnog predmeta na nivou Kantona Sarajevo, Federacije BiH, BiH ili međunarodnom takmičenju iz prethodne godine;
 - g) Potvrda o otvorenom računu iz banke jednog od roditelja/staratelja ili punoljetnog kandidata; (*Molba roditeljima/starateljima da obrate pozornost ukoliko učenik/ca postaje punoljetno lice u dogledno vrijeme od datuma objave Javnog poziva, da otvore račun u banci na njihovo ime i dostave novu potvrdu o otvorenom tekućem bankovnom računu na ime učenika iz razloga da isplata nagrada učenicima ne bi kasnila, jer će nagrade biti doznačene nakon završetka procesa obrade/analize i ocjene pristiglih prijava*).
- (2) Prijavni obrazac je sastavni dio dokumentacije te bez istog neće biti moguće vršenje vrednovanja dokumentacije.
- (3) Ukoliko bude nedostajala Izjava kandidata da se njegovi podaci mogu obrađivati u skladu sa članom 5. Zakona o zaštiti ličnih podataka („Službeni list BiH“, broj 76/11), Komisija neće razmatrati prijavu tog kandidata i prijava će biti smatrana nevažećom

Član 7.

(Dokumentacija)

- (1) Sva potrebna dokumentacija kojom se dokazuje ispunjenje kriterija za nagrađivanje učenika srednjih škola mora biti original ili ovjerena kopija.
- (2) Neblagovremene i nepotpune prijave neće biti uzete u razmatranje.
- (3) Dokumentacija se ne vraća kandidatima.

Član 8.

(Predaja prijave na Javni poziv)

Prijave na Javni poziv podnose se u roku od 15 dana od dana objavljivanja na službenoj web stranici Grada Sarajeva, lično na protokol ili putem pošte na adresu Gradska uprava Grada Sarajeva, Ćemaluša broj 9/III, sa naznakom „Javni poziv za nagrađivanje učenika srednjih škola koji su postigli zapažene rezultate na zvaničnim takmičenjima iz određenih nastavnih predmeta u prethodnoj 2023./2024. školskoj godini iz Budžeta Grada Sarajeva za 2024. godinu“. Prijavni obrazac se preuzima na službenoj web stranici Grada Sarajeva, www.sarajevo.ba.

III POSTUPAK ODREĐIVANJA NAGRADE

Član 9.

(Komisija)

- (1) Komisiju iz stava (1) ovog člana čini 7 (sedam) članova, od kojih su 4 člana predstavnici Gradskog vijeća Grada Sarajeva i 3 člana predstavnici Gradske uprave Grada Sarajeva.
- (2) Nakon donošenja Odluke iz stava (3) ovog člana, gradonačelnik/ca Grada Sarajeva donosi Rješenje o imenovanju zajedničke Komisije za razmatranje, obradu i analizu pristiglih prijava na Javni poziv za nagrađivanje učenika srednjih škola koji su postigli zapažene rezultate na zvaničnim takmičenjima iz određenih nastavnih predmeta u prethodnoj školskoj godini iz Budžeta Grada Sarajeva.
- (3) Sve prijave pristigle na Javni poziv, Služba sa kompletnom dokumentacijom upućuje na sjednicu zajedničke Komisije za razmatranje, obradu i analizu pristiglih prijava na Javni poziv za nagrađivanje učenika srednjih škola koji su postigli zapažene rezultate na zvaničnim takmičenjima iz određenih nastavnih predmeta u prethodnoj 2023./2024. školskoj godini iz Budžeta Grada Sarajeva za 2024. godinu (u daljnjem tekstu: „Komisija“).
- (4) Gradsko vijeće Grada Sarajeva svake godine donosi novu Odluku za nagrađivanje učenika srednjih škola koji su postigli zapažene rezultate na zvaničnim takmičenjima iz određenih nastavnih predmeta u prethodnoj školskoj godini.
- (5) Gradsko vijeće Grada Sarajeva svake godine donosi novu odluku o izboru članova Komisije za razmatranje, obradu i analizu pristiglih prijava na Javni poziv za nagrađivanje učenika srednjih škola koji su postigli zapažene rezultate na zvaničnim takmičenjima iz određenih nastavnih predmeta u prethodnoj školskoj godini iz Budžeta Grada Sarajeva.

Član 10.

(Analiza i obrada podataka)

- (1) Služba će izraditi u računarskom programu „Office Excel“, alat za lakšu analizu i obradu podataka dobivenih iz dostavljene dokumentacije kandidata, te će predstavnik Komisije iz Gradske uprave vršiti unošenje podataka uz verifikaciju člana Komisije iz reda predstavnika Gradskog vijeća Grada Sarajeva.
- (2) Alat u „Office Excel“ potrebno je da sadrži tri tabele, i to:
 - a) Prva tabela je za analizu podataka i treba da sadrži kolone za: redni broj, izjava kandidata da se njegovi podaci mogu obrađivati u skladu sa člana 5. Zakona o zaštiti ličnih podataka („Službeni glasnik BiH“, broj 76/11), ime, prezime, državljanstvo BiH, uspjeh ostvaren u

prethodnoj školskoj godini, potvrda o postignutom rezultatu (osvojeno mjesto, nivo) i napomenu;

- b) Druga tabela se odnosi na određivanje novčanih iznosa na osnovu zaprimljenih podataka, te treba da sadrži kolone za nivoe takmičenja navedene redom prema dolje (kantonalno takmičenje, federalno takmičenje, državno takmičenje, međunarodno takmičenje), Koeficijent za takmičenje, broj kandidata koji zadovoljavaju, procent učešća kandidata, iznose po nivoima sa konačnim iznosima te računski dio sa drugim koeficijentima za prvo, drugo i treće mjesto, te učešće učenika na međunarodnim takmičenjima.
- c) Treća tabela se odnosi na određivanje iznosa za nagrađivanje kandidata i sadrži kolone za redni broj, ime, prezime, ostvareno mjesto, uspjeh iz prethodne školske godine, te pripadajući iznos.

(3) Iz stava (2) tačka b), koeficijenti za nivoe takmičenja iznose:

- a) Kantonalni nivo: 0.15 ili 15% od ukupnog iznosa osiguranog u Budžetu Grada Sarajeva;
- b) Federalni nivo: 0.20 ili 20% od ukupnog iznosa osiguranog u Budžetu Grada Sarajeva;
- c) Državni nivo: 0.30 ili 30% od ukupnog iznosa osiguranog u Budžetu Grada Sarajeva;
- d) Međunarodni nivo: 0.35 ili 35% od ukupnog iznosa osiguranog u Budžetu Grada Sarajeva.

(4) Iz stava 2) tačka b), drugi koeficijenti za izračun prema ostvarenim mjestima iznose:

a) Za Kantonalni, Federalni i Državni nivo:

- 1) 1. mjesto: 0.55 ili 55% od pripadajućeg postotka nivoa takmičenja;
- 2) 2. mjesto: 0.30 ili 0.30 % od pripadajućeg postotka nivoa takmičenja;
- 3) 3. mjesto: 0.15 ili 0.15 % od pripadajućeg postotka nivoa takmičenja.

b) Za Međunarodni nivo:

- 4) 1. mjesto: 0.50 ili 50% od pripadajućeg postotka nivoa takmičenja;
- 5) 2. mjesto: 0.25 ili 25% od pripadajućeg postotka nivoa takmičenja;
- 6) 3. mjesto: 0.15 ili 15% od pripadajućeg postotka nivoa takmičenja;
- 7) Učešće: 0.1 ili 10% od pripadajućeg postotka nivoa takmičenja.

(5) U slučaju da više od 150 kandidata zadovolji kriterije Javnog poziva, Komisija ima pravo prilagoditi koeficijente, što će biti konstatovano posebnim zaključkom u zapisniku.

(6) U slučaju da manje od 70 kandidata zadovolji kriterije Javnog poziva, Komisija ima pravo prilagoditi koeficijente, čak i da zbir koeficijenata ne iznosi cijelih 1.00, ali da najviše može biti neutrošeno 15% od planiranih sredstava, što će biti konstatovano posebnim zaključkom u zapisniku.

(7) Ostvareni iznos za kandidate raspoređuje se tako što se prvo sredstva osigurana u Budžetu Grada Sarajeva množe u skladu sa koeficijentima iz stava (3) ovog člana, a onda se dobivena sredstva određenog nivoa posebno množe sa svakim pripadajućim ostvarenim mjestom prema koeficijentima iz stava (4), nakon čega se dobiveni iznos dijeli sa brojem kandidata pripadajućeg ostvarenog mjesta po nivoima.

(8) U tabeli iz stava (2) tačka c), u posljednjoj koloni, „pripadajući iznos“ se računa tako što se ostvareni prosjek ocjena iz prethodne godine kandidata dijeli sa brojem pet, koji predstavlja najveći mogući ostvareni uspjeh (odličan), a kako bi se dobio koeficijent/procent kojim se množi pripadajući iznos iz tabele iz stava (2) tačka c).

Član 11.
(Rad Komisije)

- (1) Zadatak zajedničke Komisije iz člana 9. ove odluke je da prijave pristigle na Javni poziv obradi i analizira u skladu sa kriterijima utvrđenim ovom odlukom, odnosno uslovima navedenim u Javnom pozivu.
- (2) Nakon obrade i analize svih pristiglih prijava, Komisija sačinjava preliminarnu listu uspješnih kandidata te istu dostavlja gradonačelniku/ci Grada Sarajeva na saglasnost.
- (3) Preliminarna lista uspješno izabranih kandidata bit će objavljena na službenoj web stranici Grada Sarajeva, www.sarajevo.ba.
- (4) Gradonačelnik/ca Grada Sarajeva će sa izabranim učenicima, odnosno njihovim roditeljima/starateljima, potpisati pojedinačne Ugovore o nagradama kojima će se regulirati međusobna prava i obaveze.

IV PRELAZNE I ZAVRŠNE ODREDBE

Član 12.
(Nadzor)

- (1) Nadzor nad provedbom ove Odluke vrši gradonačelnik/ca Grada Sarajeva putem Službe.
- (2) Gradonačelnik/ca Grada Sarajeva se obavezuje da putem Službe jedanput godišnje dostavi Gradskom vijeću Grada Sarajeva Izvještaj o provođenju ove odluke.

Član 13.
(Utvrđivanje sredstava)

Sredstva za nagrađivanje utvrđuju se u Budžetu Grada Sarajeva svake godine za narednu godinu.

Član 14.
(Saradanja sa drugim institucijama)

Gradonačelnik/ca Grada Sarajeva može putem Službe da kontaktira relevantne ustanove u slučaju potrebe eventualnih provjera dokumentacije za učenike prijavljene na Javni poziv.

Član 15.
(Izmjene i dopune)

Izmjene i dopune Odluke vrše se na način i po postupku za njeno donošenje.

Član 16.
(Stupanje na snagu)

Ova odluka stupa na snagu narednog dana od dana objavljivanja u „Službenim novinama Kantona Sarajevo“.

PREDSJEDAVALJUĆI GRADSKOG VIJEĆA

Jasmin Ademović

Broj:
Sarajevo, __. __. 2024. godine

OBRAZLOŽENJE

PRAVNI OSNOV

Pravni osnov za donošenje Odluke sadržan je u članu 31. stav (1) tačka b) Statuta Grada Sarajeva kojim je propisano da Gradsko vijeće Grada Sarajeva donosi odluke, druge propise i opće akte i daje njihovo tumačenje.

RAZLOZI DONOŠENJA

Grad Sarajevo u proteklih nekoliko godina uspješno realizira projekat stipendiranja učenika srednjih škola iz Budžeta Grada Sarajeva. Projekat se pokazao izuzetno uspješan, što potvrđuje činjenica da je broj prijava na konkurs za dodjelu stipendija kontinuirano rastao. Projekat stipendiranja je orijentiran prema učenicima srednjih strukovnih/zanatskih škola. Gradsko vijeće Grada Sarajevo je već nekoliko puta zaprimalo inicijative za uspostavljanje fonda za nagrađivanje učenika za izvrsnost, a koji bi se finansirao iz Budžeta Grada Sarajevo. Shodno iznesenom, Gradska služba za obrazovanje, sport, kulturu i mlade pristupila je izradi ovog prijedloga odluke kojom se reguliraju uslovi i kriteriji za realizaciju postupka dodjele nagrada za učenike srednjih škola koji su postigli zapažene rezultate na zvaničnim takmičenjima iz određenih nastavnih predmeta u prethodnoj 2023./2024. školskoj godini iz Budžeta Grada Sarajeva za 2024. godinu.

Shodno naprijed navedenom, cijeneći izuzetan značaj ovog projekta, kao i potrebu da se uredi oblast nagrađivanja učenika, odnosno propis kojim se regulira ova oblast, Gradsko vijeće Grada Sarajeva donijelo je ovu odluku.

FINANSIJSKA SREDSTVA

Finansijska sredstva za realizaciju ove odluke osigurana su u Budžetu Grada Sarajeva za 2024. godinu, i to u iznosu od 50.000,00 KM.